

■ COLUMNA

Hallo medias – faschai Voss job!

DAVID SPINNLER

Avant passa 20 onns hai jau fatg la scolaziun per daventar schurnalist. Dapi lura ha il mund midà cumplettamain. Oz vivan las medias en in mund digital ed ina schurnalista sto esser ina persuna abla da far multitasking. Ils principis schurnalistics n'èn dentant betg auters.

Per exempel: Rapportar davart fatgs confermads – i dovra duas funtaunas per ina novitad. Dar la pussaivladad da prender posiziun a tuttas varts tar in tema cuntra-vers, u sche insatgi vegn criticat. Far dumondas criticas e nagina «Hofberichterstattung». Responder ils 5 w's che derivan dals plectudestgs «wer, was, wann, wie und warum?».

Ma durant ils temps turbulents actuals na chapesch jau betg pli il mund. L'exempel da las elecziuns en America musa da maniera extrema quant impurtant ch'in schurnalissem independent, critic e fair è. In schurnalissem che mussa ina istorgia da differentas varts. In schurnalissem che pussibilitescha a mai da valitar quai che capita en mia regiun, mes pajais e sin tut il mund. E tge capita tar nus? La critica vegn tashentada. L'unic tema ch'exista anc en las medias è il virus da corona e l'agir



da la societad envers la smanatscha da quest virus. Dumondas criticas? Naginas. E quai gist tar in tema, nua che nagin na sa propri tgenins ch'èn ils fatgs decisivs. Gist tar in tema, nua che jau sco laic fiss avisà tant sco mai da survegnir analisas profundas che mettan a lieu u che decleran tge ch'ins sa e tge betg.

Ma jau survegn be anc «las cifras». E pervi da las cifras èsi da prender «las mesiras». Tuttas duas expressiuns èn candidats per il pled il pli trid da l'onn. Mesiras brutalas che destrueschan blers elements impurtants da nosa societad.

Ma è quai tut giustifitgà? Èsi propri uschia che la situaziun senza mesiras drasticas fiss anc mendra? Savain nus propri avunda, per agir uschia sco che nus agin? Ha insatgi propri fatg quellas dumondas? Jau hai guardà diversas da las conferenzas da medias en il center da medias

da la Chasa federala – dumondas criticas n'hai jau betg propri udì. Jau sun restà a chasa en il homeoffice davant il visur ed avess gugent fatg las dumondas che avessan interessà mai – ma nagin dals schurnalists n'ha fatg las dumondas. Jau sai ch'igl ha segiramain dà era emissiuns criticas. Ma la gronda part da las news e dals rapports discurren di per di be da «las cifras» e da «las mesiras».

Schurnalistas e schurnalists èn era savens persunas in pau «renitent» che na sa laschan insumma betg gugent far prescripziuns – gist perquai ch'els ed ellas èn persunas criticas che mettan en dumonda tut. Jau sun surprais da blers schurnalists che na fan quai betg ussa.

En noss pajais è segirain bler vegnì fatg bain durant questa crisa da pandemia. Ma a las collegas ed als collegas schurnalists e schurnalistas en quest pajais driz jau urgentamain l'appel: Vus stuais far dumondas criticas – quai è Voss job! Betg per provocar, ma per dar a mai sco lectur, auditor u aspectatur la pussaivladad da valitar la situaziun uschè bain sco pussaivel. Gist ussa cun quest virus «diabolic».

David Spinnler da Sta. Maria è manegestiun dal Parc da natüra Biosfera Val Müstair – ed ha lavurà divers onns sco schurnalist tar RTR.